

Na osnovu člana 63. stav (1) tačka d) Zakona o visokom obrazovanju (Prečišćeni tekst) („Službene novine Tuzlanskog kantona“, broj: 21/21, 22/21, 5/22, 11/22, 16/22, 5/25 i 14/25), člana 52. stav (1) tačka b) i člana 295. stav (3) Statuta JU Univerzitet u Tuzli (Prečišćeni tekst) broj: 03-5695-1-2/23 od 18.10.2023. godine, broj: 03-3905-1-1/24 od 09.07.2024. godine i broj: 03-5111-1-1/24 od 19.09.2024. godine, Senat Univerziteta u Tuzli na sjednici održanoj 21.01.2026. godine donio je

PRAVILNIK O NAGRAĐIVANJU AKADEMSKOG OSOBLJA UNIVERZITETA U TUZLI

I. OPĆE ODREDBE

Član 1.

(Svrha i cilj pravilnika)

- (1) Svrha Pravilnika je utvrđivanje kategorije, kriterija i postupka nagrađivanja akademskog osoblja izabranog na Univerzitetu u Tuzli na osnovu naučno-istraživačkog, umjetničko-stvaralačkog rada i izvrsnosti u radu.
- (2) Cilj Pravilnika je poticanje akademskog osoblja u naučno-istraživačkom radu, umjetničko-stvaralačkom radu i izdavačkoj djelatnosti u svrhu napredovanja Univerziteta u Tuzli i Bosne i Hercegovine na svjetskim rang listama univerziteta i država prema njihovom doprinosu nauci/umjetnosti (QS World University Rankings, Times Higher Education (THE) World University Rankings, Academic Ranking of World Universities (ARWU) / Shanghai Ranking, Webometrics Ranking of World Universities).
- (3) Pravilnikom se predviđa posebno nagrađivanje umjetničko-stvaralačkog rada i nagrađivanje rada u oblasti disciplina od posebnog nacionalnog značaja.
- (4) Nagrade određene ovim Pravilnikom dodjeljuju se u obliku prigodne plakete i nagrade/priznanja.

II. KOMISIJA ZA NAUKU I UMJETNOST

Član 2.

(Komisija za nauku i umjetnost)

- (1) Na prijedlog Rektora, Senat Univerziteta u Tuzli (u daljem tekstu: Univerzitet) imenuje Komisiju za nauku i umjetnost Univerziteta (u daljem tekstu: Komisija).
- (2) Članove Komisije čine Prorektor za naučno-istraživački rad, po jedan predstavnik sa svakog fakulteta i jedan predstavnik Akademije dramskih umjetnosti.
- (3) Predsjedavanje Komisijom vrši Prorektor za naučno-istraživački rad.
- (4) Mandat članova Komisije traje četiri godine, a isti članovi mogu biti ponovno izabrani.
- (5) Komisija odluke donosi većinom glasova od ukupnog broja članova na zatvorenim sjednicama.
- (6) Komisija na sjednicama o svom radu vodi zapisnik.
- (7) Član Komisije koji je predložen za određenu nagradu/priznanje se mora izuzeti od glasanja za kategoriju nagrade za koju je predložen.
- (8) U slučaju jednakog broja glasova, glas predsjednika Komisije je odlučujući.

III. VRSTE NAGRADA/PRIZNANJA I KRITERIJI ZA NJIHOVU DODJELU

Član 3.

(Vrste nagrada/priznanja)

- (1) Akademskom osoblju izabranom na Univerzitetu u Tuzli nagrade/priznanja za izvrsnost dodjeljuju se u šest kategorija i to za:

- a) Naučno-istraživački rad;
 - b) Umjetničko-stvaralački rad;
 - c) Prijavu i realizaciju međunarodnih projekata;
 - d) Rad u disciplinama od posebnog nacionalnog značaja;
 - e) Saradnju sa institucijama i privredom;
 - f) Organizaciju naučno-istraživačkih/umjetničko-stvaralačkih manifestacija.
- (2) Po jedna nagrada/priznanje dodjeljuje se za:
- a) doprinos u prethodnoj godini;
 - b) višegodišnji doprinos/životno djelo.
- (3) Nagrada/priznanje za životno djelo, istoj osobi može se dodijeliti samo jednom.
- (4) Kandidat može biti nagrađen u više kategorija iz stava (1) ovog člana.
- (5) U svakoj kategoriji dodjeljuje se po jedna nagrada/priznanje.
- (6) Nagrade/priznanja se dodjeljuju jednom godišnje u tekućoj akademskoj godini, a za prethodnu akademsku godinu.

Član 4.

(Kriteriji za nagrađivanje)

- (1) Naučni rad se vrednuje radovima objavljenim u časopisima koje registruje baza podataka Web of Science Core Collection (WoSCC). Uzimaju se u obzir samo radovi pod afilijacijom Univerziteta u Tuzli, koji su duži od dvije stranice i koji su u WoSCC-u kategorisani kao članci (Document Type: Articles) ili kao pregledni radovi (Document Type: Review).
- (2) Izuzetno, kraće radove i radove kategorisane u neki drug tip dokumenta može odobriti Komisija za nauku i umjetnost Univerziteta. Pored toga, ista Komisija može odobriti vrednovanje naučnih monografija/knjiga, odnosno poglavlja u njima, pod uslovom da su objavljene u prestižnim svjetskim izdavačkim kućama.
- (3) Naučni radovi se razvrstavaju po kvartilima (Q1, Q2, Q3 i Q4 prema faktoru uticaja časopisa (JIF kvartili) u Journal Citation Reports (JCR)). Ako časopis u kojem je objavljen rad iz oblasti humanističkih nauka i umjetnosti (Arts & Humanities Citation Index) nije svrstan u određenu kvartilu prema JCR, tada se kvartila određuje prema SCImago Journal Rank (SJR) iz Elsevierove citatne baze podataka Scopus. Time se postiže ravnopravna zastupljenost svih naučnih oblasti i grupacija Univerziteta.
- (4) Umjetnički projekti se razvrstavaju po redoslijedu bodovanja i prema faktoru uticaja u svijetu umjetnosti.

Član 5.

(Nagrada za izvrsnost u naučno-istraživačkom radu)

- (1) Nagrada za izvrsnost u naučno-istraživačkom radu dodijelit će se kandidatu koji je u protekloj akademskoj godini ostvario najvišu naučnu produktivnost s obzirom na broj bodova ostvarenih temeljem objave u časopisima koji su indeksirani u prestižnim bazama Web of Science - WoSCC i Scopus i/ili ako je objavio naučnu monografiju ili uredničku knjigu kod međunarodno priznatih izdavača.
- (2) Kandidati skupljaju bodove na osnovu objavljenih naučnih radova koji su razvrstani po kvartilima i to: Q1- 10 bodova, Q2- 7 bodova, Q3- 4 boda i Q4- 2 boda. Ukoliko je objavljen rad svrstan u više kvartila, kao referentni se uzima bolje rangirani kvartil. Radovi u ESCI indeksu vrednuju se sa 1 bodom. Broj bodova za dati rad se dijeli sa brojem koautora tog rada. Za prve, zadnje i korespondentne autore minimalni broj bodova je 25% od broja bodova za dati kvartil.
- (3) Ako je rad svrstan u kvartil Q1 minimalni broj bodova je 2, osim za rad svrstan prema WoSCC-u u grupu autora (Group Author(s)) za koji je minimalni broj bodova 1.

(4) Broj bodova za objavljenu monografiju/knjigu je 15 bodova, a za objavljeno poglavlje u monografiji/knjizi broj bodova je 5. Broj bodova za monografiju, knjigu ili poglavlje u knjizi se dijeli sa brojem autora navedenog djela.

(5) Kandidati koji imaju 3 boda ili više od 3 boda se nagrađuju na osnovu broja bodova.

(6) Ukoliko više kandidata ima isti broj bodova, u obzir se uzima najveći faktor (tzv. Impact factor - IF) odjeka časopisa što će se utvrditi uvidom u relevantne baze.

Član 6.

(Nagrada za izvrsnost u umjetničko-stvaralačkom radu)

(1) Nagrada za izvrsnost u umjetničko-stvaralačkom radu dodijelit će se kandidatu koji je:

- a) U protekloj akademskoj godini ostvario najvišu umjetničku produktivnost temeljem osvojenih nagrada na prestižnom filmskom festivalu „Oskar – Nagrada američke Akademije filmske umjetnosti i nauke“, a u funkciji glumca (glavna ili sporedna uloga) ili u funkciji producenta. (10 bodova).
- b) U protekloj akademskoj godini ostvario najvišu umjetničku produktivnost temeljem nagrada u funkciji glumca (glavna ili sporedna uloga) ili u funkciji producenta na prestižnim međunarodnim filmskim festivalima, i to: „Mostra“ – Filmski festival u Veneciji; Filmski festival u Kanu; „Zlatni globus“; Zlatni leopard – Međunarodni filmski festival u Lukarnu; Britanske akademije filmske i televizijske umjetnosti – BAFTA; Međunarodni filmski festival u Berlinu; Sandens filmski festival; „Feniks“ – Evropske filmske nagrade; „Rotterdam film festival“; „Karlovy vari film festival“. (7 bodova)
- c) U protekloj akademskoj godini temeljem nagrada u funkciji glumca (glavna ili sporedna uloga) ili u funkciji producenta imao učešće na prestižnim međunarodnim regionalnim filmskim i pozorišnim festivalima, i to: „Mess“ Sarajevo; „Sterijino pozorje“ Novi Sad; „Sarajevo film festival“ Sarajevo; „Pula film festival“; „FEST“ Beograd film festival. (4 boda)
- d) Učešće u prestižnim profesionalnim umjetničkim projektima (pozorište, film, radio i televizija) a koji su značajno doprinijeli razvoju kulture i umjetnosti u državi i šire, te su praćeni medijima sa nacionalnom frekvencijom u kojoj se umjetnički projekt realizovao. (2 boda)

(2) Pod „prestižni“ pozorišni ili filmski festivali podrazumijevaju se i oni festivali na kojima učešće uzimaju profesionalne produkcije i pozorišni ili filmski projekti iz bar četiri države i više, a koji su značajno doprinijeli razvoju kulture i umjetnosti u državi i šire, te su praćeni medijima sa nacionalnom frekvencijom u kojoj se umjetnički projekt realizovao.

(3) Pod „prestižni profesionalni umjetnički projekti i profesionalne produkcije“ za pozorište smatraju se umjetnički pozorišni projekti koji su doprinijeli razvoju pozorišne umjetnosti u profesionalnim produkcijama, koje su navedene redoslijedom od više do manje rangiranih u kojima je pozorišni projekt realiziran, a koje je režirao diplomirani redatelj:

- a) Nacionalno pozorište;
- b) Narodno pozorište;
- c) Javne ustanove za kulturu;

(4) Pod „prestižni profesionalni umjetnički projekti i profesionalne produkcije“ za film, radio i televiziju smatraju se umjetnički projekti realizirani ispred producenstskih kuća i institucija koje se bave kinematografijom, a koje je režirao diplomirani redatelj, te koji su doprinijeli razvoju filmske, radio i televizijske umjetnosti.

Član 7.

(Nagrada za izvrsnost u realizaciji međunarodnih projekata)

Nagrada za izvrsnost u prijavi i realizaciji međunarodnih projekata će se dodijeliti kandidatu koji je bio voditelj ili glavni istraživač na međunarodnom projektu koji je uspješno okončan, što znači da je dobio pozitivan izvještaj nadzornog tijela, a prema sljedećim kriterijima: voditelj ili glavni istraživač na projektu (4 boda - fakultet nositelj, 2 boda - fakultet partner), vrijednost projekta dodijeljena fakultetu/ADU (do 50.000,00 € - 1 bod, od 50.000,00 – 100.000,00€ - 2 boda, od 100.000,00 – 200.000,00€ - 3 boda, preko 200.000,00€ - 4 boda), broj međunarodnih partnera na projektu (do 5 partnera - 1 bod, 5 i više partnera - 2 boda), broj uključenih saradnika/nastavnika s fakulteta (do 5 - 1 bod, 5 i više - 2 boda), broj studenata uključenih u pojedine projektne aktivnosti (do 10 studenata - 1 bod, 10 i više - 2 boda) i broj doktoranata uključenih u pojedine projekte (1 do 2 - 1 bod, 3 do 4 - 2 boda).

Član 8.

(Nagrada za izvrsnost za rad u disciplinama od posebnog nacionalnog značaja)

(1) Dodjeljuje se jedna nagrada za poseban doprinos u oblasti nacionalnih humanističkih i društvenih disciplina (jezik, književnost, historija, muzikologija, etnomuzikologija, etnologija, arheologija, pravo, ekonomija, socijalni rad, politologija, sociologija, psihologija, pedagogija, logopedija, rehabilitacija, komunikologija i dr.) za prethodnu godinu.

(2) Dodjeljuje se jedna nagrada za višegodišnji poseban doprinos u oblasti nacionalnih humanističkih i društvenih disciplina (jezik, književnost, historija, muzikologija, etnomuzikologija, etnologija, arheologija, pravo, ekonomija, socijalni rad, politologija, sociologija, psihologija, pedagogija, logopedija, rehabilitacija, komunikologija i dr.).

Član 9.

(Priznanje za uspješnu saradnju sa institucijama i privredom)

Priznanje za uspješnu saradnju sa institucijama i privredom dodjeljuje se kandidatu koji je u protekloj godini ugovorio i realizirao projekt/projekte ili druge vrste usluga sa privredom najviše ugovorene vrijednosti ili ostvario ostale aktivnosti koje doprinose jačanju saradnje Univerziteta s privredom, transferu znanja, tehnologija i inovacija u privredi.

Član 10.

(Priznanje za organizovanje naučno-istraživačkih manifestacija)

(1) Priznanje za organizovanje naučno-istraživačkih manifestacija će se dodijeliti kandidatu koji je bio predsjedavajući organizacionog odbora manifestacije, a koji je ostvario najveći broj bodova prema sljedećim kriterijima:

- a) Tradicija organizovanja manifestacije (maksimalan broj bodova po ovom kriteriju: 20 bodova):
 - za svaku prethodnu organizaciju 2 boda.
- b) Broj institucija uključenih u organizaciju manifestacije (maksimalan broj bodova po ovom kriteriju: 30 bodova):
 - organizator jedna ili dvije institucije 10 bodova
 - organizatori tri ili četiri institucije 20 bodova
 - organizatori pet ili više institucija 30 bodova
- c) Nivo organizacije manifestacije (maksimalan broj bodova po ovom kriteriju: 20 bodova):
 - manifestacija sa međunarodnim učešćem 20 bodova
 - manifestacija bez međunarodnog učešća 10 bodova

- d) Referentnost zbornika/časopisa manifestacije (maksimalan broj bodova po ovom kriteriju: 10 bodova):
- objavljivanje zbornika abstrakata sa manifestacije 2 boda
 - objavljivanje zbornika/časopisa sa manifestacije 3 boda
 - indeksacija zbornika/časopisa sa manifestacije u referentnim bazama 5 bodova.

Član 11.

(Priznanje za organizovanje umjetničko-stvaralačkih manifestacija)

(1) Priznanje za organizovanje umjetničko-stvaralačkih manifestacija će se dodijeliti kandidatu koji je bio predsjedavajući organizacionog odbora manifestacije, a koji je ostvario najveći broj bodova prema sljedećim kriterijima:

- a) Tradicija organizovanja manifestacije (maksimalan broj bodova po ovom kriteriju: 20 bodova)
 - za svaku prethodnu organizaciju 2 boda
- b) Broj institucija uključenih u organizaciju manifestacije (maksimalan broj bodova po ovom kriteriju: 30 bodova):
 - organizator jedna ili dvije institucije 10 bodova
 - organizatori tri ili četiri institucije 20 bodova
 - organizatori pet ili više institucija 30 bodova
- c) Nivo organizacije manifestacije (maksimalan broj bodova po ovom kriteriju: 20 bodova):
 - manifestacija sa međunarodnim učešćem 20 bodova
 - manifestacija bez međunarodnog učešća 10 bodova.

IV. POSTUPAK ZA DODJELU NAGRADA I PRIZNANJA

Član 12.

(Pokretanje postupka nagrađivanja)

- (1) Komisija će tokom tekuće akademske godine objaviti poziv za dodjelu nagrada/priznanja za proteklu akademsku godinu, najkasnije do 30. septembra tekuće akademske godine.
- (2) Prijedloge za dodjelu nagrada/priznanja mogu podnijeti dekan, prodekani ili nastavnici/saradnici, bilo da kandidiraju sebe osobno ili drugog nastavnika/saradnika.
- (3) Prijedlog mora biti pisan i obrazložen, a uz njega priložena relevantna dokumentacija kojom se dokazuje da predloženi kandidat ispunjava uvjete za dodjelu nagrade/priznanja.
- (4) Relevantna dokumentacija kojom se dokazuje da predloženi kandidat ispunjava uvjete za dodjelu nagrade/priznanja definisana je tekstom Poziva.
- (5) Poziv ostaje otvoren 30 dana.

Član 13.

(Utvrdjivanje liste kandidata i nagrada/priznanja)

- (1) U oktobru svake godine Komisija utvrđuje listu kandidata za nagrađivanje za naučni/umjetnički doprinos u prethodnoj godini.
- (2) Lista kandidata za nagrađivanje naučno-istraživačkog rada sadrži i broj bodova određen u skladu sa članom 4. ovog Pravilnika.
- (3) Prorektor za naučno-istraživački rad uz mišljenje Službe za ekonomske poslove Univerziteta utvrđuje prijedlog ukupnog novčanog iznosa nagrada u skladu sa raspoloživim finansijskim sredstvima, a posebnu Odluku o visini novčanih nagrada donosi Upravni odbor Univerziteta.

(4) U slučaju promjene okolnosti u pogledu raspoloživih finansijskih sredstava predviđenih za dodjelu nagrada, prorektor za naučno-istraživački rad će uputiti prijedlog za izmjenu Odluke Upravnog odbora u smislu stava (3) ovog člana.

(5) Nagrađenima se dodjeljuje i priznanje u pisanom obliku, čiji sadržaj utvrđuje Senat Univerziteta, na prijedlog Komisije.

(6) Ukoliko više kandidata prema ostvarenim rezultatima iz pojedine kategorije ostvaruje pravo na nagradu/priznanje za izvrsnost, ista/o će se uručiti svakom kandidatu, a novčana nagrada se dijeli između nagrađenih kandidata.

(7) Komisija podnosi Rektor u izvještaj s prijedlogom o dodjeli nagrada/priznanja za izvrsnost za sve kategorije nagrađivanja utvrđene ovim Pravilnikom.

(8) Nagrade/priznanja uručuje Rektor Univerziteta, na svečanosti povodom obilježavanja Dana Univerziteta.

(9) Ako Komisija procijeni da niti jedan kandidat ne udovoljava kriterijima za nagrađivanje u nekoj od kategorija, nagrada/priznanje za tu kategoriju se neće dodijeliti te akademske godine.

V. PRELAZNE I ZAVRŠNE ODREDBE

Član 14.

(Završne odredbe)

(1) Finansijska sredstva za nagrađivanje/dodjeljivanje sredstava prema ovom Pravilniku obezbjeđivat će se iz sredstava Fonda za nagrađivanje akademskog osoblja i studenata Univerziteta u Tuzli na osnovu naučno-istraživačkog i umjetničkog rada i iz drugih raspoloživih sredstava.

(2) Efekti primjene ovoga Pravilnika će se kontinuirano analizirati od strane Centra za osiguranje kvaliteta i internu evaluaciju Univerziteta i Pravilnik će se po potrebi modificirati i dopunjavati po propisanoj proceduri.

(3) Registar o dodjeljenim nagradama/priznanjima vodi Ured za naučno-istraživački rad Univerziteta.

(4) Odluka o nagradi/priznanju se prilaže Registru i odlaže u personalni dosije nagrađenog zaposlenika ako je isti u radnom odnosu na Univerzitetu.

(5) Svaka odluka o dodjeli nagrada/priznanja objavljuje se na oglasnoj ploči i internet stranici Univerziteta/fakulteta/ADU najkasnije 8 (osam) dana prije njezine dodjele, poštujući odredbe propisa koji reguliraju oblast zaštite ličnih podataka.

Član 15.

(Terminološko korištenje roda)

Terminološko korištenje muškog gramatičkog roda u ovom Pravilniku jednako se odnosi i na ženski gramatički rod.

Član 16.

(Stupanje na snagu)

Pravilnik stupa na snagu danom donošenja.

UNIVERZITET U TUZLI
SENAT

Broj: 03-282-1-12.3/26
Tuzla, 21.01.2026. godine



PREDSJEDAVAJUĆI SENATA

Dr.sc. Amir Karić, red.profesor